

屯留縣志目次

第一卷

星野 晷度附

祥異

沿革

疆域

山川

封建

古蹟

第二卷

城池

公署

學校

書院義學附

祠廟

寺觀

驛傳

兵防

第三卷

田賦

諸營

課程

鹽法

坊里

鄉甲

風俗  
物產附

第四卷

職官

宦績

選舉  
徵辟仕進附

科貢  
例貢雜職附

第五卷

名賢

忠義孝弟循良文苑武烈附

列女

節婦烈婦貞女烈女

隱逸

流寓

遷徙附

仙釋

方伎

醫學訓科陰陽訓術附

封廕

牌坊

陵墓

濠澤園附

第六卷

藝文上

制勅 記序

第七卷

藝文中

考辨文論贊  
跋誌銘墓表跋 跋 跋 命 說

第八卷

藝文下

箴 歌 賦 詩

雜記

糾誤

目錄

卷目

目次

三

屯留縣志卷七

藝文

考

絳河考

邑侯

趙廷煦

歲丁亥余蒞屯之一月閱城隍有水自西南遶郭之北而東問之則絳河也按之邑乘云源出縣西南八十里盤秀山之陰八泉湧出飛瀑如珠經縣治東流三十里入潞城縣交漳村與濁漳合乃知絳固溢於八泉即入景中飛瀑所衍者也考之禹貢北過潞水至於大陸北播爲九河同爲逆河入於海河渠書亦云廝二渠以引

河北載之高地過降水至於大陸播爲九河入於渤海是絳水乃河所必經其爲要衝古而然矣但禹貢字爲澤孔傳及河渠書俱作降余嘗疑之及觀夏紀索隱註云降水字從糸出信都國與雩池漳河並流入海則絳之爲降降古文通義耳地志云降水卽冀州信都縣枯澤渠豈邑乘所載出疑山東南麓今已涸者是耶程氏云降瀆自唐貝州經城北入南宮貫信都北與河合石渠謂北過降水之文當以信都者爲是蓋河徙東南全非故道自漢以來漳且自達於海則古今形勢固有不盡合者惟括地志降水源出潞州屯留縣西南方山

東北流冀州入海此與綱目及通考通典金史所載相符詎不足信歟且屯邑以山爲屏民生岩棲谷汲田畦無百畝之平非有以流其惡而沃其原則民且告病吾觀絳水蜿蜒曲折而東爲衆水所交滙如蒲谷水高麗水由西流入疑水雞鳴水於西南流入三鰲水於西北流入馬跑泉於東北流入自源及委數千里而遙灌溉資其利芻菱出其中爭流奔赴浩浩乎鉅觀而先受其潤者固屯之地也按之圖籍考其源流不必常歷其地而青疇綠野包絡迴環時與洪波之洶湧隱現於煙雲杳靄之間者可一舉目而遇之至於水以絳名前宰屠



君以爲水無不清地之所染余竊思之房陵水色鮮潔  
遂名粉水武都有紫泥貢之封璽故名紫水淄川出淄  
水俗傳以爲其波似漆如此之類不可殫述誠有如屠  
君所云者茲故不復贅又括地志云絳水一名白水今  
名弗泉流出絳山或以爲絳水所自出故卽以名之然  
考陸氏廣輿記云絳水由絳縣達聞喜界智伯謂絳水  
可灌安邑者卽此按之全圖絳山在聞喜東南則所云  
絳山似非盤秀山及通典之鹿瀆山也故附及之

三賢故里考

邑人

馮錫晉

三賢天下士非一鄉士屯留烏得而私之顧名賢遺迹

所至引重往往其里居之地數典忘祖他人因而附會之不惟述之於口而又筆之於書張公良通志平陽人廣輿記留侯墓在襄陵龜山麓其說未必無據及考之左傳杜注長子屯留二縣屬上黨郡前漢張良傳封爲留侯又地理志陳留文義顯別則留侯之爲純留不爲陳留久矣且邑水南村有留侯廟興旺村有留侯墓遺迹昭然邑志列於流寓故邑侯梁公迪詩云子房名相後鄉井是純留在漢爲湯沐依韓卽首邱英風瞻廟貌世業感松楸邑乘書流寓何人識故侯辨訛也鮑公永世謂長子人然余嘗讀史及長子志皆以爲屯留人意

者漢時郡治長子遂收入長子志與要其爲屯留人無  
疑獨王公聰若知若不知人無道之者嗚呼張鮑二公  
勲猷炳著宜乎兩地之人共爭之王公生南北朝齊時  
儒士罕傳尙書之業聰兼通之而聲稱寂如何世俗之  
所重在彼不在此耶吾友霽庭祖堂博學好古同謀立  
石表之而三賢乃並峙不朽焉

辨

國體國法固是有無輕重辨

邑人 暴謙貞

自古無百年不易之治而有百年不易之道道者所以  
參天人而居其會所以適於輕重之宜也天有四時

行人君法之則治失之則亂人有聖智中材爲政者因時而施化察失而立防威德迭興輕重隨用然後體立於定法得其可是歸於一此國運熾興之由亦百王莫見之機耳其體與法與是輕重之說何居乎自古元首矢謨股肱作誠喜起一堂體有在於上下者此天澤之定義也自昔望天地觀江河因山谷不吹毛而求疵不洗垢而察斑因道全法體有在於持大者此天下無不治之盛也有法以繼其體則大綱舉細目治若理絲者把緒於手而縷晰條分天下無不肖之議論有體而繼以法則百度貞衆動肅若善陶者躍冶於金而方之圓

之天下得合一之旨歸繁縷可以惜大體而天威咫尺猶得與堂下之拜者留體終於一綫恭己可以成幾者而躬親庶獄猶得與不問錢穀者存體治於不遺或以暴虐之甚而約法三章遂成寬大之仁或以廢弛之極而嚴明政事乃建中興之宇體以化煩囂而章服有等不妨誰嗣之歌興法以定人心而蜀治太嚴自立畫一之教令體其骨幹乎法其繫絡而國是其定體乎其相因而不離乎體其準的乎法其射則而國是其中的之至當乎不有準的將安倣乎此豈意自爲政天地立而萬物成大體立而天地定法范張而天地平是非真而

天地清明以不朽體元以贊化繼天以立極是在王人  
知此輕重而已矣然則輕重果有一定乎夫熊徑烏伸  
可以延歷不可爲續骨之膏結繩忘言可稱太上不可  
施末世之衆平則養之疾則攻之德教除殘刑罰平理  
時畸而任體時畸而任法時以國是定國體時以國法  
成國是達權救弊總歸於道干變萬化不離其時孝宣  
封阿母而乘權放恣致亂嫡嗣此失體卽以失法孝宣  
審政理而嚴威峻法海內肅清此得法卽以得體勿勞  
疲細小而經國大務當自斷裁雖改移劇趾而嚴重致  
平素稱仁厚恩可賜而郎官必不可輕山可錫而弄臣

必不可隱或納言而忘人君之體或斬僕以伸國家之  
法有定體卽有定是無定體卽無定是有國法卽有國  
是無國法卽無國是低低昂昂高高下下伸縮合節輕  
重不爽千古政理執此可券惟人主參天人而用之可  
乎

絳水辨

邑侯  
屠直

城之西北有河環焉號曰絳水午日偕友泛蒲后於絳  
干饒有賦清興問曰水一素爾盍而絳友曰天生來予  
默忖不然已考邑乘亦未悉其義伏枕思曰木有本水  
決有源詢乃長年曰絳水源於盤秀山不禁問水直窈

到源頭越六月六日下連口呼埠頭挽舟溯流而上由  
蓮岡過入仙臺歷東西兩陽迤西折而南烏塌渠直上  
紅嶺曲曲下七八泉望之蒼然峙之互如有翠嶂插空  
盤秀山也山下有泉入出淙淙有聲湛若冰壺予覽焉  
然曰惟源潔哉已過石橋紆迴三里赤霞壁小憩具齋  
勝盤盤層登曲陟頂上怪松萬壑奇鳥千嘯真閬苑仙  
境坐石不覺飄飄欲仙迷煙霞暮不思歸山人引之小  
蘿庵宿夜半松風颯颯萬籟駢吹少頃旭光晃晃透櫺  
啟戶東方白小奴趨歸櫂舟沿流而下十里如藍過紅  
嶺三十里如丹又烏渠而東陽七十里兩水合交半顏



半紫土人喚紫龍彎夕懸舟古槐根下山間明月水上  
清風予亦就枕黎明放艇而東百里浪湧沙翻突然一  
變有若奔馬旋至入仙蓮岡水愈急色亦緞直商山背  
折而北地漸闊水漸平波光散穀雲樹流影舟下且行  
且逗不二里榜人喝停篙凭檣下視依午日所泛絳水  
也上連口豁然醒遽然歎曰噫絳果本源也哉地染爾  
相彼作室堆練千疋色麤具淫投之藍藍投之朱朱投  
之青黃青黃然則雜茲之絳不亦類是與抱朴子曰水  
無不清人無不善

文

聖廟上梁文

邑侯 劉 綱

立兩間參三才君親師永賴秀五行拔羣類生養教同  
功道切人心理由天性於茲薄矣惡所厚乎恭維

至聖先師道德貫百王誠明超列聖經籍著中天常明  
之日月綱常振萬古不竭之江河上繼羲皇堯舜淵源  
下啟濂洛關閩扁鑰千百年牆杏生春億萬載幽蘭元  
馥七十子言行箴規罔非矩度三千徒應酬叩激皆是  
準繩仰思

先聖先賢蓋葺高堂高宇况西國名邑地接太行之脈  
方輿上黨水連河洛之流崑山列屏幃於南隱隱龍潛

之勢絳水環襟帶於北悠悠蚓曲之形鳳凰峯蓮花  
岩山夾峙於前高麗泉神女瀑巨津尾分於後瞻茲  
地開出巨人雖山川之炳靈實教化之純被比因荒  
乃漸堯滴學校久廢致風猷之不競廟廡圯敝將瞻  
之弗欽詔令壅而不宜父兄以爲大戚顧惟竊食敢不  
究心竊效魯山之化而未能欽慕若水之功而有得愧  
乏公輸之巧欲起子完之功擴大其規模盡於基址聿  
新乎制作謀於神人取鍛潞河之湄不須亂也伐材介  
山之巔何用楫乎虹梁卧碧海之蒼龍畫棟起丹山之  
彩鳳方員偃植務丹牖以肆煥棖題藻說必體制以不

凡輪奐輒與觀者爭先以爲快規模立就聞之興歌其  
出奇萃百巧以增修極一時之壯麗儔功見效獻室有  
期不惟制度同山川而益久且使文運與造化而同流

清廟巍峩列瑚璉罇罍之器高堂突兀蓄珪璋梁棟之

材文章增氣爭誇耀日輝星土類馳風竝看攀龍附鳳

爰卜吉日遂茲永圖聊出詞章於梁欂櫨均童髦以懽

呼拋梁東趙魯燕齊入望中地控名邦霧秀萃騰騰文

焰拂長空拋梁西三峻屹立聳雲齊和氣鬱蒸生俊傑

黃金榜上後先題拋梁南嶷山勢與太行參層柱孤根

蟠天地中函元氣吐青嵐拋梁北萬里河山秦晉國當

年土宇任瓜分今見輿圖歸聖國拋梁上列星耿耿皆  
旋向爭挾董策進巖廊坐取功名總人望拋梁下膏腴  
之田生瑞稼民間豐稔樂時雍閭巷絃歌享聖化伏願  
上梁之後文運亨嘉士風不振精神日倍揮班管倒屣  
懸河科第歲增著祖鞭登雲步月銑心繡口文追韓柳  
歐蘇藻鎖玉衡學屈班楊賈馬戰文陣賈以一當百之  
勇窮道本極涵三爲一之功有賴聖神少裨王化

邑侯何公太孺人壽文

邑人 暴 煜  
觀察

嘗讀詩南山有臺之篇曰樂只君子民之父母夫爲民  
上者能使民戴之如父母則其平日之能視民如子可

知爲民上者既視民如子使民戴之如父母則其平日之能盡子道而事其父母又可知邑侯何公蒞吾屯兩年有奇拊循士庶政化大洽於是白叟黃童輿頌四作乃以太夫人劉遠隔天涯於客冬迎養抵署閱萬里如旦夕歷險阻如平夷四境莫不歡欣而鼓舞可謂孝思之感格天人矣戊寅八月廿九日適當設帨之辰邑之人郵札而請序於余余託公編氓之列感公德愛稔公治行其何能已於一言哉太夫人裔出青田來歸望族其相夫子也敬戒備至事舅姑則承順維謹甘旨之奉必躬必親孝養極誠爲近今罕覩未幾而矢志捐舟太

夫人泣謂公曰汝世業詩書當勵志成立以慰藉先人  
公以是益銳學壬申舉於鄉闈二年錄明通卷奉文  
命簡任來晉初署永甯州牧旋授屯邑令太夫人至署  
時見公輒曰汝寒士也得受

國恩勉圖報効在此日耳公每出廳視事必囑曰愛民  
如子毋傷厚道昔雋不疑爲京兆尹每行縣錄囚徒還  
其母問不疑多所平反母喜笑爲飲食言語或亡所出  
母怒爲不食賢哉母也太夫人有馬我屯號稱難治土  
瘠民貧地當孔道徭役殷繁昔之宰斯邑者深苦撫恤  
之艱維公下車軫念民瘼凡可寬民之力節民之財罔

不悉心籌畫釐剔弊端他如遇士也以禮懲惡也以法  
勘獄案也以神明馭胥役也以嚴察人第知公之卓越  
於羣工者爲最著抑知源遠流長其受學於趨庭承休  
於幃教者爲益久且渥乎余遠守閩漳未及宣揚盛美  
然方今諸上游皆海內名賢廉公之深譽公不置口自  
茲而洵厯封疆晉秉樞軸大展其經濟設施使天下之  
蒼赤無異吾屯邑此日之愛戴公者而太夫人康強福  
壽當必有時獲蒙存問如昔太宗之於張齊賢母晉國  
夫人故事南山之什曰民之父母又曰遐不眉壽余旣  
引詩所謂民之父母者頌公而卽以眉壽黃耇者囑邑



之父老子弟從容致辭侑太夫人一鬮總取其義於南山之詩云爾

論

鮑永傳論

前宋

范蔚宗

鮑永守義於故主斯可以事新主矣必以其衆受寵斯可以受大寵矣若乃言之者雖誠而聞之未譬其苟進之悅易以情納持正之忤難以理求平誠能釋利以循道居方以從義君子之概也

贈光祿寺丞路聰論

明大學士

申時行

昔魯仲連云所貴天下士者為人排患釋難解紛亂而

無取也豈屯留路公謂耶天下無事謀智勇辨之士無  
所施其材粹然有急連城跨邑之吏坐異輦而不事事  
廣棄僇辱者何可勝數也乃如路公身不挂銅墨位不  
當民社起委巷布衣中設策奮力存孤城殲劇寇成功  
不屈可不謂奇士馬及其厚施薄望不輕爲然諾身所  
貴者惟恐見之古稱俠士之義方茲茂矣假令公借尺  
土立奧潔而升本朝其建樹可勝道哉然公身不試用  
而其效託之乎後人夫天道猶酌也挹彼注此豈不信  
乎

交友論

邑人 霍中達

黃勉齋言朋友列人倫又所以綱紀人倫我中憲與弟  
子萬雖名高天黨不過三晉人士何敢曠而擬之四海  
九州乃以激源遇楊左以楊左善魏大中周順昌李應  
昇周宗建董其昌諸公不但已也又與鄒忠介趙忠毅  
往來贈答隔面談心爲綱常名教所賴其地步示人遠  
矣何後人靡靡親嗜利忘義之輩晚游手好閑之流妄  
冀人品卓越德業成也噫

贊

題尹孺人節孝贊

邑侯

周人龍

人不幸爲婦又不幸爲節婦不幸爲節婦幸有節婦

世道人心蓋世道常存人心不死惟節耳已男子不節  
王珪魏徵皆再嫁婦女子不節卓文君黨家姬皆穿錦  
食稻敗常亂俗之獸禽卓哉霍母防身守貞豈惟閨門  
懿道抑媿朝堂二心

跋

鄉試後跋

邑人 暴謙貞

歲辛酉爲天子新膺圖籙之元載臣待罪省垣循咨承  
乏副史官臣謙益往典浙試臣樸散無能往陳秘館耗  
大官供具與上方筆札者三年今居掖梧鹿鹿靡所獻  
替茲事之役幾幸畢弋碩大光明圭璋樸棫之彥進於

皇上庶幾少解官謗自附於以人事君之義啣命以往  
言涉淵冰齋戒洸頽肅拜將事事既單爲錄以獻臣宜  
有言未簡竊謂士以鉛槧之業與臣忽成鍼石之引其  
神契允足知心勉醮箴告不敢繁稱勦說以謏衆聞臣  
觀多士初舉於鄉行省諸臣導揚天子休命燕而饗之  
使工歌鹿鳴者三夫鹿鳴明王所以燕羣臣嘉賓也多  
士甫就鄉舉累然一書生耳天子遂從而賓之其爲饗  
綦隆矣食之以禮樂之以樂賓主間有不盡愛至真意  
篤摯必先示好於周行君子攝儀大人格正是則是做  
洵不越此臣今有以論多士矣曷有之履實田書有

之王道蕩蕩皆周行也士束髮受書以至膺仕師世節  
助庸宅揆節義文章道德坊表天下萬世皆是物也  
一不遵於周行則爲徑爲竇遇則爲於巷困則爲於石  
投足僣迹終身偃偃其何之今日者有笙簧之樂有承  
塗之將而又有周行之示士自此用賓於王利有攸往  
曠然若發蒙矣浙河東西古稱人材澤藪其在昭代名  
卿碩彥錯落日星悉數之幾不能終若方正學于忠肅  
王文成孫忠烈諸君子猶龍之宗有鱗而鳳之集有翼  
也靖難之事正學植君臣大義於人情反覆之時逆藩  
之變忠烈折其鋒文成戡其亂殉事成事千古烜赫至

忠肅以孤身隻手倡社稷有君之義遏邪論於南轅返  
六飛於北狩所謂狂瀾砥柱者也多士生長諸君子之  
鄉爲聖朝譽髦之士而業不追躡其盛德不克紹其光  
是不亦昭持衡者之過而貽鄉國之恥乎如恥之莫若  
於所謂周行者而求之諸君子之於周行也非苟知之  
實允蹈之篤孝端謹聖賢自別正學之周行也狷介忠  
誠分謗任怨一以利國爲嗜欲忠肅之周行也方畧便  
宜慷慨誓師百讒交構計不反顧文成之周行也有三  
旬九食安貧樂道之正學而後有百折不回之正學有  
食不重味居不闢廬清風兩袖之忠肅而後有赤手回

天之忠肅有投荒瀕危澄心精慮之文成而後有吐  
定傾之文成向令變難卒臨於所謂周行者稍參以委  
蛇之見而雜以遷就之心利害震怵於外毀譽錯歧於  
中其神不全其志不壯其氣不揚又何以排議奮臂勒  
鼎圖麟而昭揭日月於天地間乎多士其厚自矜奮釋  
思周行之義而無自退遜乎於爾鄉先正詩不云乎高  
山仰止德音孔膠行彼周道其則不遠是在多士之求  
之耳今疆場不靖震我上京內讐潛滋談虎嚙指聖天  
子宵旰憂勞思得忠肅交成於此邦也故臣等此來實  
有奢望顧不以建功策勲還相勸勉而汲汲於所謂用



行者蓋功名事業就與不就皆天也士所可自必與自信者此物此志耳考地志會稽實揚州鎮山而東南之美者會稽竹箭獨載於爾雅記有之如竹箭之有筠也如松柏之有心也貫四時而不改柯易葉多士於文郁乎彬彬乎信可謂東南之美矣臣所論於士其不改柯易葉者也括而羽之鏃而礪之進而爲忠肅文成以盡竹箭之美惟多士之能不然則亦守其樸學師其素心無改柯易葉舍竹箭以效栝樅之用此多士所可自必與自信而臣所可期望於多士者也臣所謂詔士以周行者盡此矣庸敢次第其語申明鹿鳴燕饗之義以

終嘉賓式燕之德音而進之天子告厥成事臣又讀詩  
小雅至六月之序謂自鹿鳴至菁莪先王所以治天下  
者盡在於是小雅既廢則多方侵叛而國家式微故鄉  
飲酒禮及燕禮皆歌鹿鳴四牧皇華然後笙入堂下間  
奏南陔白華華黍士答君王以天保皇上初服額俊多  
士以南陔白華孝友潔白之德起而歌鹿鳴小雅之什  
其如天大貺乎王國匡則彤弓錫四方不敢侵叛而國  
家靈長小醜豈虞跳梁臣今日爲多士歌鹿鳴也它日  
爲皇上歌六月也臣請執是鉞以須之矣

命

誥封宜芳鄉君段朱氏訓子遺命

余以宗人作配而父時年幼沖敬修饋祀所賴儀型嚴  
明以致終身寡過於今四十有四年矣兩女皆嫁一子  
納妻復何憾焉自念我雖受朝廷爵祿猶知稼穡艱難  
克勤克儉冀偕子婦以成家而守先業於不墜不意命  
蹇嬰疾有志未伸立身成家端惟吾子是望乃子賦性  
剛暴侮慢自賢質凡近而不好學安能洗積習以游高  
明識卑陋而不好問安能盡精微而致廣大是則辜我  
之望而遺我之憂者也竊思子自幼至長我無時刻忘  
心爾父高明剛克我每兢兢落難誠恐遺我憂也

撻汝詈汝痼痲我心涕行無數氣塞胸膛爲誰痛哉痛  
吾子也區區此情誰其知之知之者神明誰其聞之聞  
之者天地而吾子反若不知不聞吾何望哉且子行義  
不勇以血氣爲剛大言不慚以攻發爲直此吾之所深  
憂而未嘗頃刻忘懷者也自今以往當以懈惰荒逸爲  
懼勤勵不息自強待旦之坐法周公當晝之眠戒宰予  
爾父雖嚴鬚髮頰白精神內耗爾宜視無形聽無聲承  
顏養志使其胸次悠然乃可爲孝不然則無以爲人無  
以爲子矣子家雖貧守廉恥以自潔子婦雖拙且姑待  
以成人酒宜深絕量貴有容有疑思問小忿當懲親睦

九族職分當然謙卑自牧人道先務功名有分天爵當  
修身命匪輕尤當謹疾深耕百畝不可妄求誦詩讀書  
以俟天命我今其逝不能再言兒遵此訓藏之篋笥用  
以示於後人

說

耕讀說

邑人 霍芝

耕安一家形質讀廟一己性天蓋田野無物不有肆吾  
力以相取多取不爲虐詩書亦無物不有非吾分所當  
取寡取卽爲貪故仕進報主顯親立念不是圖己工商  
爲機設變擇術還以欺人惟野無曠國無游勤儉爲志

家令子正其誼明其道伏處卜治國良臣所以爲民貧  
農夫之恥爲士不富非儒者所羞願與天下後世研斯  
理

啟

啟路天德

楊博

公落落不羣天下士罕入心目於貴鄉霍龍洲恒傳道  
勿衰不面而知其爲佳士也不遣管城遣帶一枝翎毛

啟瑞環霍年兄

王錫爵

吾輩寒牕居鄉不可不進士居官不可不名宦子汲汲  
名宦何不徐徐進士所期當遠大勿疑蹉跎子

又

前意非不願子仕願子進士耳忽忽數年進士可期未  
可期功名可就不可不就本夙夜匪懈之志以為官  
謂舉人不可駕進士而上

上李參憲

邑人 知府 霍應麟

糶倉本美件然今民患在艱食尤在兵餉兵餉寬一分  
力即解一分艱食之苦官惠在散粟尤在征賦征賦緩  
一日限即多一日散粟之仁上以為澤下民不以為利  
已可為不可為故弊劫之餘多事不若少事有事不若  
無事惟陳政新離聖不易然作賈仲夏兩設李次

非計不然咈百姓從己欲舉府不爲也同天便民仰大  
人調停耳

啟名閣公

楊漣

聞貴鄉路天德李子愚高品心甚仰之董程二公稱足  
下落落態殊不讓前賢前過慶陽路公休致其樹之風  
聲猶揚詡行人之口余稽都中閣人孔多某曰某官某  
曰某地總不在方孔外打算追公後塵伊是何人

啟襟漳年兄

左光斗

公贊子萬才學非不可赴功名乃廣文湮沒非湮沒正  
遠其聞望耳不然吾輩曰在朝堂與衆人是是非非所



爲何事對之不勝赧顏

啟子萬

董其昌

昔季常有康成僉云風流先生道學門生今子萬有襟  
漳可謂道學先生風流門生

請巨侯來公啟

邑人

李鍾庚

來穀來荆楓階久虛來宰相來雲來雨山城早溪來  
后天地來草木知恩父母來子民戴德恭惟來老父母  
台臺西來夫子東來聖人識透來還之機學參如來之  
妙古來卓魯今來龔黃期不來丹鳳啣來仙詔何所來

竹馬迎來花車陽春來國境

等幸慰暮來之望曷已子來之忱謹誦來日三辰仰扳  
橫來之駕聊賦鳧來數語少賡公來之歌公來燕來甯  
福祿來成公來燕來宜福祿來爲公來燕來處福祿來

下

文武生員請邑侯送學啟

邑人孫奇

帝業遠皇廟重珪璋之選國靈丕振邊陲賴扞衛之  
材治安計乎百年文武儲在一日卜劍匪易薦桃實難  
恭惟恩師台臺德隆千古剛塞兩間易禮詩書接孔孟  
之真鉢風雲龍虎譜孫吳之秘韜機械肆歌多士仰章  
天之化俾舟載詠六師奮于邁之從陳俎列豆瓊珮珊

珊輝業虞稱戈比戟犀函肅肅護山河詎一時之國珍  
寶千祀之磐石作人無歡訓旅有方某等之無未識步  
伐多愆賴天子之勗棘門不等兒戲履聖人之域牟歧  
不迷正宗竊分闕里罔裁堪經天而緯地誕荷天民有  
覺並母鞠而父生雨露生恩霜雪載德謹占某日之吉  
旭霽陽生聊將一勺之忱衷披肝懸望文茵之轂轉執  
爰前驅迂塵尾之風臨掃徑下榻莅頻講學說長屈醜  
碧煥三虞傳玉鑰釋奠告功獻琛貢象朱干兩舞綴金  
甌翹首龍光伏塵熊載

誌銘

周郡功曹崔公墓誌銘

崔君諱玉字枌林上黨屯留顯陽鄉孝義里人也其先  
炎帝胄九封望於齊地方五百秦皇受籙用始祖崔伯  
基爲太傅封清河晉后膺期因官住此太祖崔暉并雍  
二州刺史食邑屯留曾祖崔惠征南大將軍西河太守  
金紫光祿大夫祖崔虎德簡四科勳効有功除爲東宮  
洗馬明威將軍博陵太守父崔珩志業肅成文武可取  
探虎口而揮戈上魚門而懸胄故以名入司勳功高爵  
賞除爲高唐令林身藉祖父之宏基懷尼父之溫德名

流州郡聲高製錦周建德六年舉爲郡功曹何圖禍鍾  
春秋六十有二而卒以大隋大業十一年歲次乙亥正  
月甲午朔廿七日庚申葬在顯陽鄉平原之地南瞻零  
泉之水北望黃沙之山東帶濁漳西依積石刊石立銘  
其詞曰林性好閑雅博聞大度志意雄猛神資獨步  
含廣博名稱遠舉三歸十善行檀遍布泡境无常電光  
不住不戀煩惱之因同入涅槃之路忽離旒隴遊神淨  
土自在无爲祇洹之圃

隋西門郎將李公墓誌銘

君諱寶高元皇人也乃是顯預之遠胄楚王之苗裔李

伯陽之後允大國征西公南部常書洛陽公史侍葛程  
國大將軍李思仲之元孫七世祖顯魏明帝詔授上黨  
屯黃二郡守屯留公食邑二萬戶遂居上黨子孫世家  
焉高祖問魏武帝詔授驃騎大將軍曾祖征拜爲安定  
郡守祖方興安西將軍潁州刺史父元建德六年周武  
皇帝詔授西河郡守汾州刺史寶人才雄畧志性高明  
大象元年周大王召爲屯留邑主簿至二年補爲縣正  
開皇二年刺史文盛公補爲千人營主至三年補爲西  
門郎將寶清風懷遠能仁能孝能俊能恭奈金烏運轉  
玉兔時移二豎催人奄流傾謝以大業十一年十一月

卒於私第十二年歲次丙子正月葬在屯留城東四里

李高村西北尚有脫畧石斷不可讀

唐朝散大夫苗君墓誌銘

君諱裕字君綽潁川長社人也十一代祖漢景二年封

潞縣侯食邑屯留子孫因家焉曾祖貴魏封安樂郡

國侯祖壬齊諫議大夫公以隋開皇二年州貢進士行

修廉潔射策甲科起家授朝散游騎尉爰屆貞觀之嗣

遷授上黨郡王簿職總羣司能官涖政公夙彰令譽洞

曉幽微屬唐起運先赴義旗勇決驍雄摧破兇黨特授

朝散崇德賞功識道味之深探知榮辱之倚伏雖佩榮

職非其願也於時邱園守素體道居貞上元不鑿春秋  
八十有六嗣聖元年二月戊申朔十二日己未奄從風  
燭哀哉命也哲士云亡夫人郭氏乃隋驃騎將軍刺史  
璋之孫也貞專淑順聖善母儀肅穆閨闈防閑內則風  
枝不靜早已殂落以天和元年實沈之歲羽形物化卽  
以其年十月甲辰朔二十九日壬申合葬於屯留故邑  
城北一里之原恐田成碧海渚變松巒勒銘記於元石  
詞曰穆穆軒黃綿綿后稷貴賤彰顯嘉禾播殖休烈鴻  
猷信芳垂則允嗣英哲皇王羽翼泉扃永闕何齡瞬息

唐上柱國鄧君墓誌銘



君諱恢字文廓南陽人也因官從駕遂宅屯留其先蓋

基黃帝漢相侍中鄧艾之苗裔鎮北將軍鄧辰之貴允

若夫瓊根始構瑤緒發於帝軒玉樹分柯寶族興於鄧

國泊茲以降厥後大昌關關蟬聯不可同日而語矣曾

祖顯齊耀鋒將軍使持節四州諸軍事恆州刺史祖遵

明威將軍兼長流幽州都督父霞隋朝請俄遷清胡府

校尉並得謀猷王畧參預霸機有燭緹緝昭彰雲閣惟

君承家赤水蘊質紫山竹野逢猿早知劍術唐運之始

九五龍飛君預八百之期遂遙孟津之會舉旗斬將展

捷魚麗告廟崇功起家壯烈方當勳誠盛國盡節榮

歲不諱忠效莫申風霜變理大唐咸亨元年十月六日  
殞於私第嗚呼哀哉楚寶不復登壇漢珠無由照乘士  
女流涕如思鄭產之亡寮采興嗟似哭季公之歿宅兆  
無曠室多有期卽以咸亨二年十二月甲子朔十日癸  
酉遷窆於余舊城東北二里東瞻大澤龍蛇所生西瞰  
峻山風雲交會南臨絳水縣帶屯密北眺傾城聖泉靈  
異於其四勝乃置廟焉恐陵谷遷移勒斯銘記其詞曰  
壽邱孕聖魏國開基金柯燦耀玉葉凝暉千齡軒冕萬  
古垂衣君之嗣也維嶽降生松貞竹秀玉潤珠明雄圖  
鬱起謀畧縱橫閩川不駐日迫崦嵫玉辭荆岫珠沉漢

涓勒銘悽愴斯人在斯

乾隆四年縣西北二十里鄧村土地廟後因築場得此墓石始

知鄧村之所由名也

○按鄧君以從龍功階至上柱

國亦一時顯者而誌不書所歷官階所載古地如聖

泉靈異於其勝置廟

者今亦不知所在

### 唐公士驍騎尉崔君墓誌銘

公諱通字處微屯留人也聖隆宗祏緒胤武城

缺一

猷畧而言矣祖進閑居體命父瑋晦迹遺生

缺一

秀發

三芝光含兩璧惟君驪泉鑿質鳳

缺一

生姿懷橘之年

早抱雄畧屬以雪亭扈畢社首告成授君驍騎尉旌時

運也既而塗窮在已

缺一

山之曰不歸運迫居盲壘

之波遂往春秋五十而卒夫人申居氏之長女儀

亮色豐桃春操履並清言容雙麗何意鏡中鸞盡匣裡

缺一飛春秋卅六而逝矣可謂借老有歸同穴斯畢嗣

子醇藝等想陟帖而崩心念循陔而稀魄今以永淳元

年壬午之歲建亥之月廿六日乙酉合葬於村東北二

里之平原禮也宅茲勝地厝此元堂悲纏薤露響切叢

楊其銘曰武城啟祿支派屯留芳規有譽壯志無傳惟

君缺一武畧英迺標功篆素武建芳猷其一夫人之缺一

字缺一月亮儀貞言容雙麗操履兼清運中龍盡缺一為領

九泉局兮永夜千載訣兮斯享其一石於廟其一怡年

村案乾封元年正月高宗東封泰山崔以軍校從行誌云雲亭扈畢社首告成是也其云公士蓋宿衛之

石首縣志  
卷一  
言  
士當時有  
其稱也

唐處士常君墓誌銘

君諱舉字孟德屯留人也遠祖邕公之後祖江齊任相  
州司戶叅軍父貴任輕車都尉昔黃龍啓圖命族因於  
玖鳳元珪錫瑞祚土基於萬因威秦跨趙擅美於常山  
藉魏陵吳珪璋於井絡惟祖惟父衣冠不墮乃文乃武  
實謂兼資弁菜重柯縉紳無代惟公桂菀騰芬機神俊  
逸該綜強仕忠信表於州閭孝敬之道光於黨塾至於  
秋⊗臨池春花逆樹琴觴自翫僚友相趨故得姓於邱  
園乃忘言於纓冕歎川不息關水難追今以率臥拾墨

蒙嵇德州縣令以萬歲通亦元季薨於私第惟夫人張

楊貳族並以季登耳順早已朦霞質操姬姜先從窳窳

遂合葬於屯留驛北壹里之平原禮也石於同治年出縣西十里魏村

文正書時雜行草今俗書壹貳叁諸字見於古刻者釋山碑有壹字樊安碑有感字神識碑有漆字華嶽碑有拾字餘不多見漆乃漆之古文俗書為漆拾即拾字此誌九屬作玖屬九十三作玖拾叁二族作貳族一里作壹里凡數目字無不改書亦好奇矣其餘國作因月作⊗授作穉天作彳年作垂則武后新製字常君以年九十三授縣令而標題仍書處士古人之樸也所云遠祖擢公無可考

### 唐姬君墓誌銘

君諱素軒帝之苗稟姬王之胤胄曾祖留隋任廣州錄

事祖肅隋任徐州司法考瑋唐稭朝散大夫並思逸麟

經精超豹畧操刀就列利器從班暢東里之威恩奮西  
門之風彩公毓德中和資霽上善霜華澡性氣掩秋輝  
露彩凝精神光春艷詞林惹萋繡楊鳳於文條筆海深  
沈渙董蛟於辯窟然志輕軒冕性重林泉風匝相趨琴  
樽自得豈謂服祓斯漸監豐逾復以髡歷二率二匝十  
六○卒於私第春秋八十有一其率三匝十七日葬於  
村西北一里平原禮也嗣子德靜痛貫風枝悲漚露戶  
恐疑峯里躍碧海塵飛庶勒遺芳乃爲銘○鸞岫西峙

龜川東鏡仁敷動檀道融翔詠

石於道光中出姬村西  
北里許石佛溝誌不書

姓據村名知爲姬也誌中月作匪聖作聖日作○並

腐魚作匣皆奇餘如席裏  
奮堯龜豐等字亦非今體

### 唐王君墓誌銘

君諱德并州太原人也因官述職遂爲上黨郡

缺一字

原

夫駕鶴仙宋朝覺靈喬臨危聳轡忠孝可標見難投軀  
恭友所感鳴鐘鼎食燮平圖史曾祖諱茂材構廊廟器  
溫珠玉隨朝通議大夫行并州晉陽縣令祖諱觀黃金  
一諾白珪三覆唐朝正議大夫行沁州司馬父諱買風  
神霜骨耽書翫道先朝文材郎吏部常選唐朝任潞州  
寺丞惟君不藏無益之器不用非常之寶茂軒冕重琴  
書春秋五十卒於私第夫人張氏白水開源清河引派



藍田國玉營浦華珠豈謂月落仙娥星流神婺以開元

三年歲次乙卯十月己酉朔廿四日壬申葬於屯留縣

西南十五里平原社也其地即韓王按劍先都夏王乘

標舊邑東瞻驛路使皎珠星西望禪河波澄金月平原

南望極日三春絳水北臨朝宗万里嗣子胡子等孝性

純深攀號悲慕既通松檟奉遷靈柩懼陵谷之質遷銘

徽猷於琬琰乃為銘曰緱山駕鶴鄴縣乘鳧臨危吐御

見難投軀乃文乃

缺七

代謝日月居諸

石於嘉慶年出縣西南十五里

長溝嶺誌中古地禪河今無考所云東瞻驛路即屯留驛在縣西魏村南見前常君墓誌中

### 唐張君墓誌銘

君諱慶字碁南陽人也曾祖義隋任本州功曹祖祭朝

散大夫父熾驍騎尉君宿挺疑輝早班合緒馭州縣之

貞耗俯鄉閭賞性

缺

桑榆之秋遽對芙蓉之使夫人

崔氏武城人也婦德有彰母儀克著豈謂川有急流風

無靜樹息思齊授小軍隊副幼學詩禮長歲從戎不顧

險難唯祈報國何期福兮禍倚寢疾河源以開元八年

歲次庚申十一月庚戌朔廿一日庚午合葬屯留縣東

南一十里平原祀也其地鮑永名墟屯留勝邑後臨絳

水左控漳濱恐海變山移鐫銘不朽其詞曰

其一

猗歟

府君柏茂蘭芬幽戶永闕厚夜長昏

其二

恩逾孟母德

重曾親高堂有日長夜無春 其三 膝下深恩敬 其二 仁

凍雞上陣駮馬販魂

唐郭君墓誌銘

高祖諱春曾祖文寬祖隣伯父叔父府君諱榮字德明  
即代上黨潞州人也府君享年七十有一立姓侃忠  
閭蘊藝以趨時遠規章於閭里二舉俄遠終於乾祐五  
年八月三日夫人務女質肅母儀四德早章三從有備  
享年七十忽奄乾祐夫人訟三男長榮男素押副官男  
會真崔氏長男宗使院長口宋氏男思常氏男章李氏  
郅男郭万節度使牙將云 石出縣東南五里釋

缺畧尙多姑錄之以存古迹

唐河東上黨郡大都督府屯留彭君墓誌銘

君諱珽字洪珩其先宗彭祖洛川彭城彭仙公之後曾祖敬齊伏波將軍上黨太守因官子孫於此家焉父亮上柱國志重琴書博通詩禮寬而得衆敏而有功接士則握髮吐食迓賓則恭而倒屣立義則友親三益存信則用治一難敦張范之淡交喜披雲之邢呂不謂災纏二豎乏方朔之神經夢奠方楹少秦醫之良驗俄然魂乃蕩裊魄散岱宗詭炎還空形神奔滅嗚呼哽塞涕悵奚言春秋本開元七年二月殞於私第夫人如氏柔儀

洪質媿南國之無雙貞順閨連比西施之少返訓母儀  
之令則撫孤幼之慈仁因德不虧六行兼備其君居家  
至孝弃公名而不仕鑿井而飲耕田而食晝夜匍匐易  
色而養二親竭力勲勞夙興而恭君父孔懷數十怡怡  
之敬鳩行猶子五三推梨之讓尤重共被傳衫之羨干  
古流芳弟瘦兄肥之恩百齡不朽俄然病纏積朔痛疾  
弥留風燭不停奄從化德春秋卅有八開元十一年五  
月殞於私第嗣子禮順仁深至孝思慈父之悲酸泣血  
開元廿一年十一月甲子朔廿一日甲申葬於郛縣西  
北十里高原禮也前臨絳水逝矣驚波後背余吾煙霞

悽愴左盼右顧勝境尊焉其詞曰遠祖老彭不滅不生

返年壽考日月齊明何代無賢何君無暱石火須臾輪

迴無定人皆去留其有衰有盛其一三年之重七日銜悲

慎終追遠以時思之父母之年不可不知生在唐年歿

在唐時幽泉永固千秋不移其二○石於同治年出縣

西十里董家莊彭君後其父四年歿葬同塋於誌其父亮至詳祖勸齊上黨太守與前王君誌父員其丞並有裨於郡乘

### 唐封六品子李公墓誌銘

公諱安定字文德隴西狄道人也十二代祖封上黨純

留侯遂家焉雲中太守之族孫陽城太尉之滋緒恢復

疆宇功高衛霍之先開國論封位列諸侯之上高祖和

并州司馬曾祖道祖遇陪貳副尉文公坐仁義以爲郭  
據忠信而爲郭依依春柳濯濯寒松謹慎白珪嘉溫虹  
玉棲遲衡泌無忘孝敬之恭晚落簪裾不失忠貞之節  
仁道未已俄延白驥之徵蚤露斯晞遽切青龍之兆時  
開元九年五月邁疾終於里第夫人宋氏七篇馳譽五  
綺飛聲慈愛內融風儀外發年七十五開元十二年正  
月亡於私寢以開元十四年丙寅正月庚辰朔十八日  
丁酉合葬於古屯留城東南二里平原禮也嗣子行良  
等對寒泉而匍匐履荒隧而充窮夕臨墳塋碎山川之

谷蓬萊水淺成萬古之桑田逸矣吉人愾然岐嶷佩仁  
踐義懷才抱德爲物不貳與動有則滅歿荒阡寂寞郊  
塋

唐處士杜君墓誌銘

若夫五緯離天應編珠而演賦三江紀地鬱珥氣而資  
靈故得蘊用誕生載圖丹誥君諱羨字郎仁先世扶風  
京兆系也瓊根布彩已流芳於帝辛玉葉凝輝乃振翹  
於周室遠祖岐魏任上黨郡守屯留縣開國侯列土封  
疆子孫曰而宅此曾祖龍齊任忠武將軍或束髮衝冠  
立宏功於橫草或掃除妖孽奮壯志於遐荒祖國隨任



揚州江都縣令偉蠹俗而奠和則移風起詠引清流而瀉液則變鹵登歌父暉皇朝授議同三司昭義烈也其時詔曰門下杜暉等並保固城邑捍禦兇徒功效克隆宜從褒擢咸依前授惟君道洽時倫行高先慙生而靈異奇節早聞特達珪璋神机英律遐迕稱其善政閭閻讚其仁明孰謂靈砭罕徵仙丹匪驗春秋七十有二卒於里第夫人庫狄司徒二族並蹈和成性體履居貞仰道樹以徘徊則禪枝聳念俯貝葉而鑽種則寶褐登心躬儉閨闈不捨如賓之敬豈謂積善無驗俄拋異翼老灾福不輔仁忽致兩楹之酷龍胡季中終於寢室嗚呼

粵以儀鳳四季己卯之歲二月壬子朔十○辛酉舍葬  
於余吾城西北六里之原禮也東瞻故邑西瞰三窵陂  
澤滂霑帶其前漳水波瀾映其後將恐鯁癡靡固終有  
化於桑田烏文斯紀庶不紊於荒誕其詞○周邦啓業  
漢將沉沙大君有命開田承家猗歟載誕克徂光華宵  
人不致干城爪牙其一道茂經邦材隆構榘巨壑舟遷  
太蒙光謝佳城鬱兮既啓先遠俄其不借啼鳥嘶而無  
春隴草宿而何化庶清風之永穆紀元猷於大夜其二

縣西北二十五里東枝村民  
取土得此石誌中字體照錄

明奉政大夫四川按察司僉事七泉李公墓誌銘

翰林院侍讀  
學士高平 劉虞夔

不佞始生聞薦紳大夫稱說嘉隆間名御史必曰留吁  
李先生云會先生起家僉臬廷見上奏進止禹昂班行  
中爭跂而觀之曰是夫之爲人巖巖者嘗在南床草疏  
劾兩權相相豫調而陰中之出補外乃今倔强猶昔藉  
令端拱立階前豈異堯階屈軼哉亡何先生拜官之蜀  
輒翛然投簪紱歸隱蓋予嘗以言壽先生謂先生宜應  
明時出安得竟老玉人駒谷間而先生以萬曆壬辰二  
月卒矣嗟乎傷哉公卒時余方執先淑人喪不得走哭  
先生而先生仲嗣太學君儼然顧余於倚廬請銘先生

墓曰先生治命也余雅知先生安敢辭按御史中丞入  
泉李公所著狀先生諱之茂字汝陪別號七泉潞之留  
吁人先世有逸民子實者當明初時衣褐衣謁高皇帝  
於金陵陳便宜事上曰是民也而忠吾國乃命司徒爲  
立忠民巨子實生純純生孝孝生讓以明經薦入賢關  
讓生仁仁生朝卿累贈奉政大夫陝西按察司僉事娶  
於郭贈宜人即先生父母也先生生而穎異弱不好弄  
甫一齡贈公歿家故屢空郭宜人韶年持柏舟之節右  
梓纒而左抱先生嘔哺之日中突無煙也比垂髫卽卓  
犖邁倫初受孝經小學於伯丹山翁所一過不再讀已

受尙書爲文遙涌源泉援筆數千言立就乃其攻苦下  
帷不啻映雪囊螢也者嘉靖壬辰補縫衣茂才與中丞  
公俱中丞公業禮先生交歡中丞公曰相與上下其議  
論乃更業禮兩人才名嶽峙人稱晉南二李以比平輿  
二龍焉庚子舉於鄉癸卯游成均因從歐陽太史講業  
長安中太史說詩先生又更業詩蓋先生湛涵六籍包  
羅百氏以三經著聞當是時先生方用行誼表晉儒流  
中而文聲流播宇內一時學士大夫靡不以名世期先  
生而先生入上公車不屑卑卑爲經生家語竟以蠖屈  
時郭宜人垂白在堂上先生歎曰俟河之清人壽幾何

且吾親所爲歷百艱畫荻鞠我亦欲見吾所自樹耳何  
必華山之騷耳而後行遠乎於是乃就銓拜山東滋陽  
令修廢舉墜扶弱抑強左右懍懍奉要東吏舞文卽細  
如蝨首而先生洞燭之諸權貴人無敢以竿牘撓先生  
政又最慎於刑嘗夕按圖扉有童子而柎楊泣者則其  
祖負官金而三世逮者也先生惻然取贖鍰百金代之  
償帑而釋之其明決仁恕雖他多類此乙丑河決徐沛  
上命大司空出行河檄先生董夏村水憲費不煩而築  
堅大司空上河功詔增俸一級丙寅報政兩臺薦爲齊  
魯第一循良令詔予恩於是先生二親暨丙子咸受封

綸馬無何遂以賢聲異等被徵命滋陽人攀轅乞寫車  
根不得行者久之乃相與立祠祀先生紀遺愛於碑碑  
成過者輒墮淚誠思之也明年丁卯拜先生南臺監察  
御史用覃慶晉御史封時封事多留中乃請置禁中章  
奏籍以防壅蔽語侵大璫大璫皆爲股弁戊辰請告歸  
庚午入臺尋奉命巡視鳳陽倉搜剔隱弊殆盡會江北  
歲不登粟貴而金賤疏請改折公私便之魏國子爭爵  
事連勳貴大臣上命南臺議法諸直指多以嫌故引避  
先生曰法官避誰當不避者挺身斷其曲直衆取先生  
議以上襲乃定先生在臺中獨立持風裁每矢口談天

下事骨鯁不爲周容時新鄭內江以相國攝銓憲操權柄專且重非高皇帝法羣臣無敢言先生毅然草疏論之疏成以示同官而同官飛聞相國所相國銜之遂出補陝西按察司僉事然天下皆知先生出以論相故人景慕先生名咸稱爲朝陽鳳矣先生分陝當理餉甘州甘州萬里孤懸塞也屯種多積逋故事習爲羈縻無敢問先生爲屯廢而責餉於民猶反裘而負薪也乃嚴按故牘三五申令而比覈之寬其日月以待於是屯政舉而餉充鎮城圯大中丞屬先生繕葺之先生視城故沙築也沙善崩歲築歲崩民勞無有已耳乃建議易以



輒遂屹然成金城焉未幾以郭宜人喪歸癸酉會上改  
元再用覃慶晉僉憲封明年大中丞上勅功誥賜白金  
文綺乙亥免喪起補河南當分巡汝洛間攬轡登車慨  
然有范孟博澄清之志按百城之內片紙無虔吏虎冠  
噬元元者刀筆扞文網者閭右憑城社悉靡莫誰何者  
大俠椎埋爲奸者悉以三尺繩之一路肅然桃李之垂  
於行者莫之敢援也會盧氏盜礦金聚羣不逞之徒以  
倡亂先生設方略擒之餘黨鳥獸散大中丞且上先生  
彌盜功而忌者讒焉以蜚語聞上上謂先生兩朝才節  
寶臣也不宜爾下所司考驗而先生還果大白庚辰補

四川當治兵叙瀘間時都蠻新平移大將駐師守之先生招徠反側必修其戒備將吏偷不事事者嚴罰之於是衆心歡且惕靡風乃勃然振會有詔省官以叙瀘事兼領於川南先生當徙職蓋廊廟重先生望且以艱鉅畀先生而先生琴鶴東還值其配趙宜人喪遂堅卧不起時年甫六十餘或勸先生駕先生曰君不見南山之南北山之北白雲良足怡吾老陶元亮五柳幽棲自號羲皇上人吾將效焉乃誅茅治圃構風亭月榭其中以魚鳥花卉爲娛每葛巾芟服邀客清游一觴一詠暢然自適蓋十二年間人謂留吁大隱可方箕穎之重云先

生孝友仁厚貞介慷慨悉稟於天性自痛失怙早奉養  
郭宜人朝夕袒跣跪上食嘗瀝血草蔬闔宜人節於朝  
既拜旌命觀坊表輒泣然泣數行下聞者莫不感動一  
姊字長子相距六十里而遙問餽之使踵相襲於道與  
人交正色嶽嶽慎取予重然諾排難解紛義所當赴視  
利害榮辱若蛤雀蚊虻相過乎前也坦衷無城府絕不  
爲謾語卮辭傾蓋之友言必披情慄見突梯陶誕首鼠  
兩端者必憤而唾之能自忍困不能忍人困里中待生  
生舉火者無慮數十家他若助婚喪撫孤稚拯危熒燿  
券不收債者更僕未易述丙辰歲大祲盡發家庾食饑

民全活以萬計好獎引儒生開塾傳經戶外屢常滿而  
更加意敦倫守道之人雖少賤必俯而讓左脫素履奇  
袞都貴顯先生未嘗過而問焉以故宵人僇子嚴憚先  
生而賢人君子則翕然頌之不容口沒之日三晉薦紳  
皆歛歔惋歎謂天奪我人倫鑒後起者將何師焉此豈  
聲音笑貌爲之哉太史虞夔曰余觀李先生立朝大節  
炳炳如丹視古之埋輪請劍者豈讓焉一鳴輒斥迴  
外服者且十年乃先生無幾微見於顏色理官如家  
在有甘棠之愛年未耄而懸車相羊於蘭皋蕙畹之上  
春風風人夏而雨人望廬而成化嗟乎先生始終全

所謂三晉魁壘奇英非耶傳稱沒而可祀於社者徵先生其誰與歸世往往謂先生施不究蘊惜先生今先生麟趾代興焉行間方將奉先生經綸之緒建勲名於昌辰語云造物之報人不於其人於其人之天所謂報生生之天者乃於是乎在矣余不佞景行先生既誌其事於羨門之石以示鄉人士使之能自得師而繫之銘曰  
矯矯先生兩間正氣紉佩好修卓哉匡世法星身應何  
懾鼎臣忠規迪上逆耳披鱗霖雨手施何難邊吏惠澤  
感人畫形墮淚考槃邁軸干仞鳳翔德輝遠覽迹隱名  
彰里羨丹顏朝思黃髮纒帛方徵蒲車且發一朝蠲

神返太虛貞風勁節太史可書我儀古人龍門徂李世  
事先生執鞭幸矣高原大隧永兆昌隆牛眠叶吉將啟  
槐公洵美先生儒林不式億萬斯年有銘在石

明贈光祿寺卿路公墓誌銘

長平趙 軌

往余同年友李侍御八泉嘗道其鄉有廡幾古逸民者  
曰路處士率真履素蘊德奮修飭方訓後志岑岑欲駕  
流伍嗣當有顯者聞也斯其人亦足述矣一日嗣君進  
士走任持侍御狀懇銘其父墓問之則向所聞路處士  
者也嗟嗟善人茲已乎披狀處士諱棟材字大器姓路  
氏別號東溪路之屯留人也先系無乘莫稽有祖順者

生聰爲陰陽官聰配王氏有三男孟棟梁以監生爲易  
州吏目仲卽處士季棟方處士先亦爲陰陽官遭例革  
之遂韜蹤林莽爲人醕孚慙質不飫華美外若木翁而  
中則炯然邈然人自親畏聆其言則婉而確秩秩而章  
也與人交坦無機穿人亦無機穿處士者鄉人戚人族  
人咸與嫻諧無慙後言生平無事買營室無贍儲惟勤  
心於課子方進士君之幼也爲之擇塾師謹訓術以端  
蒙養長則令出就外傳凡其致情禮於傳者罔非殷務  
得其歡心以勸教事買書肆中雖捐簪珥不吝曰賣金  
買書先正曾子言之吾兒若致名科顯與時剗荆大五

宗耀吾族里猶吾出也奚啻金重乎若處士者身雖不  
仕而道欲行人不儒而心固儒矣乃嗣君祇承嚴志矢  
心下學應科丙午輒發晉解齡纔十九耳人士咸奇之  
迨癸丑登進士第觀成地官路氏固灼灼彰矣雖嗣君  
資學之粹培植之隆實處士庭訓之篤有以玉之也是  
秋督餉代郡事竣便道歸省適值處士六旬初度嗣君  
解觴膝下處士曰吾兒成名果諧吾志拜若官毋怠若  
職毋負若所學毋隳吾望心一時鄉人罔弗闐忻忻謂  
處士獲教子之報云甲寅春嗣君拜合南樂處士遺書  
戒之曰令者親民吏也始仕親民當傾心中忠愛持以清



慎勤夙終不渝斯能官矣夏季迎處士於南樂南樂之  
政紀法峻明蔚聲載境處士喜曰吾兒初服官政事不  
諳閱今若此吾慮解矣遂抽身而返今乙卯夏初處士  
忽心痛危甚嗣君聞之乞休不獲假差甯山得便省處  
士驚曰忠孝一道也若忠卽孝我矣何省爲旣曰吾痛  
瘥矣爾當遊行王事不可忽慎圖慎圖去未幾卽捐正  
寢是爲六月十五日也嗚呼處士性素沖淡終其身無  
傲無伐雖履嗣君貴如平時迨其屬纊而神氣不亂顧  
言炳炳可謂得正而斃者矣聞者鮮不愴然淚也雖其  
壽不孚德享不酬功而子姓斌斌未艾嗣君方馳騁

轍徐扞鉞蘊異時致身樞峻龍章渙頌追昭潛隱以揚  
未播之休者不謂隱淪之名者邪是宜銘銘曰膏沃者  
光必灼源濬者流必洪吁嗟處士豐其積嗇其身留裕  
嗣人先民哉

明知府霍公墓誌銘

兵部尙書上黨程正己

天啟丁卯余以憊忤權璫被謫汾上倉皇就道遂不及  
與公一晤別也然審公善飯健步履修齡未艾乃未幾  
而訃聞至余爲悼盡不能已越歲聖天子改元崇正余  
謬蒙還召道出屯邑始得一哭公己巳閏四月十七日  
將卜襄事公嗣維岳余婿也持自所爲狀詣余請銘余

以戚誼忝知公者曷忍辭公霍姓諱應麟字瑞環別號  
名闕邑之史村里人先世有諱允者生志學志學生文  
簡樸醕古舉鄉飲賓壽九十又八是爲公大父父騰號  
龍洲生而岐嶷始習舉子業霍氏文明惟龍洲公開之  
博學雄詞十戰棘闈竟艱一第以顯皇帝登極恩貢任  
遼東廣甯左衛經歷芳躅種種載在志中後以公達州  
最得贈奉直大夫四川達州知州母李氏贈宜人繼母  
王氏封太宜人龍洲公有三子伯卽公仲應鷗散官季  
應鵬河津教諭公幼失恃一切奉龍洲公庭訓惟謹象  
勺時卽補邑庠弟子員無何食邑廩與季弟同志下帷

每試冠多士邑有雙壁之稱龍洲公入國學大父年已  
近期頤公先志承順寢處飲食罔不當大父意者龍洲  
公歸而心善公意尤恢也萬厯壬午公偕季弟赴省試  
公哀然賢書季弟亦首列乙榜嗣乃得明經薦先是龍  
洲公有騰躍鵬飛之夢至是驗矣方公在闈中時恍惚  
見一冠冕者朱符鈐卷意謂新科例也已乃詢之人驚  
未有喧傳異之豈科名定數冥冥中真有司之者邪龍  
洲公宦游遼左獨留公綜理家政公一惟龍洲公命米  
鹽瑣屑不憚煩既而龍洲公疾不起公以未獲永訣抱  
終天恨杜門讀禮屏祛人事毀瘠之狀三年一日也服

闕再上春官不利始謁主爵氏授達州守至則廣詢民  
瘼銳意興除而然犀之明燭見幽隱州商王家棟者負  
寃以死歷讞莫得其情公禱之於神夢得微指尋捕獲  
一訊服商寃得雪州人無不畏服而頌神君未幾有皇  
木之役往例僉坐殷實祇爲束濕考成民不堪病公先  
以二千金招商相與裹糧入深山絕巘中濟巫峽一溟  
破舟從者胥溺公獨引捧符吏躋片木上四顧淼茫援  
者莫逮俄而上流漁人一葉相挽得免於危倏忽失漁  
人所在左右始訝以爲神嗣是諸大本應索而得額限  
弗愆當事者交章薦公矣已而元配李宜人卒宜人卒

於宦邸公屬其冢子扶廣柳還蜀道艱楚抵舍而沒公  
鬱鬱恆不懌適報最膺恩意稍釋自是器手相習士民  
愛戴循聲藉甚薦紳間臺使者方上書有部擢之請公  
自守斤斤莫爲援手僅遷寶慶倅邵陽衝渡波濤洶湧  
往來葬魚腹者相望公慨然出橐金五百爲諸好義者  
倡遂起石橋遙里許下可通舟額曰虹橋寶父老抵今  
誦公功德者不衰甫一載丁王宜人憂公哀毀不異龍  
洲公捐館時諸周身之具旣從豐縵然織毫取之俸餘  
於仲季不少責也除服補慶陽聲實懋著時郡守乏人  
廷議謂非公不可慶陽者遂擢公爲慶陽太守北地多

荒田民習游惰公首下令墾荒以復農業無幾何桑麻  
遍野民稍稍裕蓋藏矣州邑起解銀錢應其部司豫令  
緘識公第爲批給督行錙銖不以入庫衛所官軍俸糈  
卽檄諸州邑徑解衛所間有侵削者公一以法繩之演  
武場曠地若干頃公爲募民給以牛種西成所獲著令  
爲修城費孝廉關貢士唐以事誑誤雇法網中公皆爲  
之極力平反不撓法而脫於罪比以入覲行也相沿餽  
遺一概謝絕行李蕭然惟圖書數笥而已及抵都而有  
齟齬公者公歎曰仕路風波人情嶮巇何事不歸不有  
吾初服在耶遂解組不復出甘載山阿翛然塵外督農

課子之隙與一二知契徒步郊游于于適也大抵公慈  
祥和易與物無忤若大節所繫則慷慨肩承勞怨不避  
以故宦游隨地規竊赫然而清白之操可對天日民所  
爲在在尸祝奉之無斃也以至家庭而友于誼篤閭井  
而施予惠殷竿牘盡捐雞豚不事宜其卒之日無親疏  
遠邇罔不欲獻泣下也公其養遠德純可以範今式後  
者哉先是邑侯禮延鄉飲屢辭後偶一出應執事者視  
昔有處可以觀人情矣易簣時猶剖分家務訓戒後人  
靡弗非并余聞夫全而歸者不亂其公之謂矣公享壽  
七十有八元配李氏贈宜人繼配牛氏封宜人子孫綿



綿不具述銘曰於惟霍公道貌天形出也龍見處也鴻  
冥宦轍至止枯甍仆起如日於冬如哺赤子俎豆載馨  
式化爾庭既順既翕於範於型太和磅礴敦龐噩噩辟  
草而風廉頑敦薄軌物可遵令聞是新箕裘紹遠報食  
善人佳域合瑞貞珉在隧以質九京銘辭無媿

明漢中府通判李公墓誌銘

蒲州

楊世芳

別駕公掛冠而歸來也已廿載餘矣兩豆塞耳不聞雷  
聲一葉蔽目不睹泰山棲老屋下靜攝不避穀修煉不  
丹鉛止圖書數卷日與兒孫相課不知老之將至云爾  
前年歲在龍今年歲在蛇青牛賦得矣嗟哉涕自孝廉

君余年兄弟也爲大父請誌余子輩不敢辭啣淚搦管  
曰恨千里不獲飛鶴願將以一言圖龍也敬誌按狀公  
諱思謙字養德益齋其別號也世上黨屯留人公夢麀  
而生聰靈瑞秀穎悟出入志學補博士弟子員未幾登  
隆慶丁卯第知命除河南武陟令耳順調河南布政司  
檢校卽陞陝西漢中通判未幾從心歸里於茲飛象過  
礪溪宰相七春矣公爲人仁慈正直廉靜寡慾讀書樂  
之不倦汲汲牽牽欲企古人事親至孝也太公素疾且  
疽公吮喻不異黔婁君子而事繼母綽有蘆荻風篤於  
兄弟培齡兄乏嗣衣衾棺槨必克思齡兄遺兩孤撫如

已出弟思廉思睿教成秀士至痛廉弟徒泣倉皇不異  
谷合惠於姐妹姐疾然其鬚及其丈趙應奇抵漚稅四  
十餘兩無難色慈於猶子璞花官銀三百兩有奇應遣  
懼逃公悉變已產償之事襄招還誠伯道心哉其教子  
有方繩以義弗納於邪俾五子有成凜然寶禹鈞家法  
刑妻有道也苗姑性厲兼翁老病妯娌又不相得公曲  
調之如鼓瑟琴以至賑荒貸貧弔喪問疾無不周處鄉  
黨則彥方也詩曰我思古人實獲我心其公之謂與入  
上公車不獲伯樂一遇公輒曰已矣朋友勸曰巢由得  
矣蒼生若何翻然乃割武陟下車榜示一十六款首進

鄉三老陳六論反覆利害曉譬之匪怒伊教家人父子  
相詰時旱魃肆虐百姓告擾曰焚旱婆公叱曰我爲子  
而殺子不祥且曰天欲旱婆何爲不若自焚齋居減膳  
露禱索神三日又不雨百姓不懌公勞益甚夜夢一老  
至曰乞寃公寤曰天不雨固寃與晨起索招泉閱得  
一頰毒翁事全類齊庶女公問其故曰如何毒爾翁頰  
曰翁耘頰饁以其餐懸古樹上歸不知其由竟坐公斷  
曰得非樹蠹乎曷問樹劈獲蛇頰寃白是日雨上臺奇  
其事旋撥一疑獄趙科事經訊不決公一鞫卽讞上下  
稱若神明武俗多悍逼妻迫母圖財國中死者枕藉公

痛懲之下合曰有以非繼告者辟人不死世窩安康腹  
劍廿載未覺百姓死軍頭者不勝紀公廉訪囊頭暨死  
闔境稱快以至漕米馬政徵法世爲武患公力去其累  
民不知利教樹教績凡有利於民者知無不爲其士子  
久不習制舉業公曰吾爲之破天荒館課躬提一時人  
文丕變任生民望果開甲子榜嗣丙午毛生乙卯薛生  
王生彬彬繼起皆公昔日栽培桃李也至問公操又出  
常情外不知官觀其家人峻宇公拆屋人拓地公賣田  
畧一錢縣魚較何若當途嘉乃績旌乃廉譽章交集矣  
庚子入覲諸薦紳及父老遮道贈曰清風兩袖明月一

腔而墮碑淚竹不待言云無何有貧墨子推官趙索潞  
紬百疋不應歎曰我不敢殺人以媚人竟中其蠱邑人  
聞之莫不扼腕甲辰補閑散丁未遷別駕疾乞骸歸歎  
曰田園之樂樂乎哉杜門謝容披圖課子幾三十年初  
不知有人間事邑宰高其品鄉士景其德兩舉鄉賓誓  
不出也大抵公淡富貴樂清貧一生無奇好惟好讀書  
疾革猶惓惓顧諸子曰我無金玉貽子無菽粟貽子並  
無敝服垢帶貽子止有一言以貽子曰不斷書香吾可  
瞑目地下矣死之日囊橐蕭然四壁淒其惟見架上牙  
籤洽洽風動而已鄉黨弔者莫不歔歔淚下曰清白吏

子孫必有爲三公者噫所謂鄉先生沒可祀於社者其在斯人與其在斯人與厥配馮孺人先公卒懿徽公自爲銘不余贅茲卜辛未春二月廿八日吉時啟窆而與公合焉公生於嘉靖癸卯年九月初八日卒於崇正己巳年八月二十三日享年八十有七鶴髮童顏續息神色不變精凝神固殆遐算千百未艾天強之天欲爲山川惜秀子孫留有餘也云爾銘曰疇金馬濯濯不青駒爭爭也疇珂鳴戛戛不蠶振切切也富貴功名之有盡也聖賢之不死也

浙江甯海縣知縣淡庵孫公墓誌銘

邑侯 閻天培

余承乏留評甫下車卽詢問邑中賢達冀得一長者以  
自律聞象陽孫公自天台旋里杜門不出與其弟天與  
公竭力事母深得母氏懽心且兄弟甚相友愛每出入  
必偕未嘗一日離也暇則聚塾中與生徒子姪輩講論  
不輟余聞而賢之後嘗過其家見所居湫隘僅蔽風雨  
服飾器用率稱是退而歎曰居家之清貧如是則在官  
之不貪可知奈何不令於時而遽去也每於飲酒讀法  
時一接見之未嘗不心慕其爲人旣而公居太夫人喪  
哀毀過禮幾至滅性蓋自是培之庭無公之迹矣公營



葬地數年不決深懼誠信未至貽悔終身因而情事未  
伸常撫楸悲號嗟乎貧似曼卿不聞友付麥舟孝類子  
平無人代營塚壙上下無交何遇之窮也無何公亦遭  
疾竟成古人聞屬纊時猶呼母氏蓋以不得葬其母爲  
恨也嗚呼悲哉子肯播等謀葬公因持其所爲狀謁余  
丐誌銘且泣曰日月有時將葬矣計可以不朽吾父者  
惟隧間此石耳嗚呼公自有其不朽者余亦安能不朽  
公哉按狀公諱奇字象陽號澹庵姓孫氏世爲屯留人  
其曾祖諱敬祖以文章知名孫氏遂成望族子姓蕃衍  
能世其學遞至公凡四世恩歲貢者七人仕者五人壽

其矜者指不勝屈也故邑中登科第據要津者不乏人而孫氏家學淵源秉鐸鄰邑多所成就人獨稱其有儒者氣象焉公之祖諱祠功舉丈夫子四人其四卽公父諱家彥字好我文品高卓在難兄弟中有最良之目惜不壽多顏子一年而卒時公與其弟蘭年未週支榮鬢無依母李氏撫而教之卒以成立此公所以老且死猶惓惓念母不置也公生而聰敏復嗜學所讀書歷久不忘有所稱引輒刺刺不休治尚書估曲磬榘公能口授如伏生善屬文試輒驚人甚爲衡文者所賞識公益自奮勵晝則閉戶夜則嘗熊市井之人罕得識其面其

伯父竊喜計之曰大吾宗者端在斯人卽公亦未嘗不  
自負以爲掇巍科致顯位直尋常事也甲午歲俾州縣  
各貢一人公遂入國學丁酉廷試考上卷辛丑八月拜  
甯海縣令偶而得之非其所樂不知者爲公賀以爲仕  
路壅塞他人極力鑽營不能得者公取之如拾芥亦可  
藉是慰母氏也嗚呼如公之英氣逼人其志豈止欲博  
一貢宰一邑而已哉使遲之數年以老其才鎖之兩闈  
以竟其學其揚名顯親必有更赫於此者旣膺民社壯  
志遂虛先儒以少年得志與有高才能文章爲不幸政  
爲此也公受命赴浙論者或爲公危之謂公之才畧未

必遠過虞詡而甯海時勢與朝歌不同朝歌莠民梗化  
設計擒治聞風駭散甯邑濱海海寇去來靡常守禦爲  
難惡非白面書生所能辦也公到任纔二日寇逼城下  
王鎮撫引兵出戰人情洶洶靡有固志公挺身而出繕  
器械具芻糗爲固守計遣兵接應勉以忠義士氣百倍  
寇知有備遂遁去王鎮撫見公倉卒調度悉中機宜喜  
曰小范老子胸中自有甲兵甯之福也兩人遂深相結  
納爲刎頸交甯民恃以無恐時  
朝廷厭用兵議遷海上之民於內地沿海一帶悉爲灰  
燼民之無歸者攜老幼轉徙他鄉嗷嗷之聲慘不忍聞

公爲之惻然設四粥厰令四巡檢董其糶米八百餘石全活甚衆且饑饉之餘瘟疫大作死者徧野視其無王者公具棺掩之約費數百金或規之曰小惠未徧民弗懷也公曰民父母我我不賑誰當賑者視吾職之所得爲與吾力之所能爲者爲之而已非以此示惠也舊宦項應鼇因家奴盜財白於官奴挾仇誣鼇通海寇依律坐斬繫獄十餘年公檢舊案閱之心知其冤力爲申雪獲免甯民黃紀之妻與趙淑京之妻兄弟也兩姓約爲婚姻以岳母董奴爲媒以花燭爲禮紀亡家業蕭條京將女改頃氏紀子玉訟於官京長公明決俛禮書張

天錫餽金二百公佯受之庭訊時盡得其情因取原金  
十二兩給京作聘儀餘付玉充妝奩費今擇日迎親呼  
京至案前爲陳說一與之醮終身不改大義京亦愧服  
兵民間之無不稱快夫雀蟻微物也餽雀渡蟻古今稱  
盛德焉雞絲細故也破雞鞭絲吏民頌神明焉若夫賑  
饑掩骼有德可懷辯冤扶弱有威可畏如公者方之古  
人詎不偉哉且公之循政更有不可泯滅者實爲正學  
方先生故里舊祠在邑南之岳龍山公特加繕葺以妥  
忠魂又爲增祀田視原額有加俾俎豆常新每拜謁輒  
揮涕曰夷齊死後君臣寢薄篤斯義者唯先生一人而

已更仰體

聖天子右文至意留心作人捐俸五十金重修魁光樓  
聚多士絃誦其中退食之暇親來省試時復取正學先  
生大節共相砥礪期不愧先正士之親色笑者莫不喜  
其來而嗟其晚也夫崇獎忠義人紀以立造就譽髦文  
教彌隆此真為治之急務而俗吏之所謙讓未遑者也  
其他善政未易更僕數姑誌其大者如此而公之廉明  
仁恕亦畧見於此矣但地方荒殘民間逋賦累億萬計  
公切於撫字常與民相寬假竟不為當路者所容治民  
有心獲上無術公且奈之何哉然聞公北旋時邑中父

老皆爲隕涕老幼相扶攜送者約數千人夫公蒞甯僅  
三載其所設施尙未展盡底蘊今且放廢不過空谷間  
一閒人耳非有威力足以攝服吾民而民不忍舍之而  
去豈盡民情之厚毋亦公之感之者深與嗚呼假令公  
當日者不賑饑不掩骼不爲民辯冤抑不捐金營造在  
上者度未必以此短公且賈其禦寇之力以急聚歛矜  
其明辯之智以察秋毫存其賑捐之金以實囊橐則逋  
賦未必如此之多其黜公未必如此之速卽不幸見黜  
亦未必蔬食飲水貧困如此之甚至不能祭葬其母也  
顧乃急於彼而緩於此不爲鷹鷂爲鸞鳳不爲繭絲爲



保障是猶彈琴瑟於好竿之門陳文繡於裸體之國宜  
其柄鑿不相入也悲夫是宜銘銘曰志不在貢而恩拔  
之志不欲仕而縣令之無意而得之無罪而去之嗚呼  
縣公竟已於斯彼蒼可階而升吾將謁司命而問之

奉政大夫同知銜歷任直隸東鹿懷安豐潤縣知

縣楊君墓誌銘

翰林院編修前  
湖北學政河東

賈 瑚

君諱中桂字丹林予同年友也幼嗜學及長偉軀幹志  
趣高雅凡經史百家罔不涉獵尤愛讀左傳爲文有奇  
氣下筆千言滔滔莫禦汪良山太史視學山右賞其才  
擢入邑庠踰年食餼丙午占解海內爭誦其文丁未試

禮闈居邇於予暇輒互訪作竟夜談喜論當世每見民間利害時政得失慷慨激烈若迫於身然偶指其失亦必虛心聽受不膠己見勇於從善性使然也澀於遇屢舉不第歲癸丑以大挑知縣分發直隸數攝篆所至有政聲初知束鹿適蝗起鄰境多禱之神君慨然曰蝗傷民稼何祀之有躬至野撲之民感悟各率妻子擊逐田間凡三日而蝗盡善決疑獄一日方視事突有告其妻被人殺者無兇首闔署譁然君陽爲慰藉密飭差檢其家獲血襪焉一訊而服左右驚爲神君曰此易辨耳豈有報命案而服新其襪者乎是以知其詐也其明察類

此知懷安值歲大旱君步禱於邑之花山拜水畢雷雨驟從瓶中出夜二更返署四境霑浹懷人抃舞調知豐潤地當孔道兵差絡繹君部署周至馬賊不犯境民安其業論功加同知銜嘗侍讌李子和廉訪方有疑讞詢衆未答君曰罪疑惟輕廉訪以爲有學術壽陽相國亦以勤於吏事清正自矢不事營求等語奏保闕謁相國相國問君以所長君曰無長惟誠心愛民而已相國深嘉之旋補棗強未奉部覆丁母憂匍匐扶柩千里歸葬自卜兆以至合塋事事盡禮服闋辦天津釐務朝夕趨公積勞成疾竟以是卒時同治七年十一月十八日也

享年五十有二曾祖三就鄉飲耆賓祖芳考逢寅皆  
贈如君職先娶張宜人李宜人早卒繼娶崔宜人性賢  
淑君未達時館於家弟大椿等從之學宜人紡織佐讀  
淬勵諸叔皆底於成奉姑尤謹君執掌仕途不以甘旨  
爲憂者宜人之力也先君八年卒子男二人長心田李  
出殤次玉田崔出女二人長張出適典籍李公生馨之  
長子次今宜人謝氏出字前知南皮縣武君士選之次  
子宜人今偕子玉田將歸營葬丐予誌壙予知君深不  
敢以不文辭謹識巔末以示揚之子孫云銘曰驚於名  
者行缺巧於宦者政拙較是二者吾其奚說猗嗟楊子

親順民悅孝平惟孝兄弟切切施于有政獄片言折不  
刑其方不溷其潔明神鑒之雨沛蝗滅流水湯湯高山  
截截於戲邈矣千秋卓絕我懷其人銘此幽碣同治八  
年七月十七日上石

墓表

明贈文林郎南京山東道監察御史李公墓表

翰林院侍讀學士左

春坊左諭德吳郡

翟景純

山西之俗故多堯舜遺風余少閱傳記則心知向往焉  
既登仕籍守官史局後道澤潞登上黨歷平陽蒲坂躬  
進父老訪逸事徒慨然西望既而與同年友八泉李子

尚智輩相上下李子晉產也乃時時就問方今俗尚異  
同則聞山西其士民敦本業而鮮浮惰其女子勤織作  
而賤淫巧故其土瘠而生不匱蓋猶有先聖遺風焉李  
子登第時其父豫田翁沒已十餘年其母趙氏實撫而  
教之每同年友聚會間談及家世李子輒泣然曰智少  
也孤李宗幾隕今智兄弟得以自立無辱先人之世者  
皆母力也因泣不止後同年友聚會不復談家世恐傷  
李子心然聞豫田翁樂易而畏法勤生而喜施與人煦  
煦不少自崖巽然醜酒負氣者輒引避之耕穫所入朝  
夕僅給至歲禡民饑輒傾所有相救助甯自節縮翁蓋

長者固宜其後有興也李子初授清苑令有善政擢晉御史居南臺以考最蒙恩贈豫田翁爲御史封母爲太孺人太孺人戒李子無忘國恩無忝父訓李子益砥礪厯官青州知府山東按察司副使所至咸有治績吏民畏而懷之迨戊午李子弟尙信復舉於鄉李宗益曹人謂豫田翁雖亡不亡益多太孺人之教云豫田翁諱仲雷字動之生以成化丁未六月二十日卒以嘉靖乙未十月二十六日享年四十有九太孺人趙氏生以成化癸卯十二月五日卒以嘉靖壬戌四月九日享年八十是年季冬二十二日尙智等將改豫田翁兆奉太孺人

樞合葬龍門岡新阡乃緘辭遣使姻友今禮部主事路  
君王道狀請余表其墓余維李氏家世子姓之賢詳具  
志中可無論也余不識豫田翁然觀路君狀翁雖晦迹  
邱園不以文采自見而純慎好義不失爲篤行君子蓋  
有石奮之風矣太孺人當守志之時三子尙幼內外多  
故即田廬尙未必保太孺人乃毅然以成夫之志自任  
含悲茹辛力持門祚日課二子以義方使各樹勳揚名  
可不謂賢乎夫婦之禮猶君臣然故或始之或終之始  
之者天道也君道也夫道也終之者地道也臣道也婦  
道也若李母太孺人蓋得代終之義焉今故特表之亦



欲李子推母訓以從王事不敢有其成也後之過斯墓而聞其風者尙亦有感焉

徵君子美徐公墓表

邑人 暴 煊

丁酉之冬余將北上應

廷試趨候予兄於濱樂分司署竟夕談心之餘嘗言吾

鄉前輩讀書家以研友子萬徐公爲首稱久矣余心焉

識之頃者子萬公之姪登峯痛其考子美公之早卒也

乞余言以表諸墓余不文憶予兄之言謹按狀以紀徐

氏世居邑西北之常莊自始祖行代有隱德歷傳三祖

自泰舉耆筵子二長逢源字澤長邑庠生舉鄉飲賓次

道源字流長恩貢生文學蜚聲載邑乘澤長生子三庠  
生俠字子靜廩生傑字子萬公諱佳字子美別號峻麓  
山人性淡靜喜讀書手不釋卷默而好深潛之思嘗自  
匾其室曰尋樂一日不披吟則志意惄然不以功名熱  
中日與二三同志酌觴嘯吟以自娛尤工書法筆意宗  
柳誠懇蓋以心正一語自矢也梵宮羽堂墨迹甚夥對  
公之筆力至不忍易其壁噫公之字爲之公之人爲之  
也生平無疾言遽色與人交沖澹夷愉不爲崖崖摸稜  
之行遠近文人望形表而影附者皆恨相見之晚故諸  
之詩文咸擬以古之高人達士云然則公譽極當時垂

延於廿年之久者亦可以識其志潔行芳之梗概矣公  
卒於乾隆壬午年七月十九日距生於康熙癸巳年八  
月廿七日得年五十一元配楊孺人廩生楊公肇和女繼  
配李孺人子二長達上字登峯廩生娶常公和女卒繼  
娶程公錫運女卒繼娶程公錫禧女次達超玉樓促駕  
娶劉公玉女孫二達上子勵聘庠生李君耀先女達超  
子勁娶霍公廷瓚女孫女一適余姊丈恩貢生候銓儒  
學教諭李君九標子庠生孜昔馬少游自足文而願鄉  
里稱爲善人以公之樂天無悶不汲汲於名利間而能  
扶道義厚人倫於無窮所謂一鄉之善士非與向以來

獲識荆爲憾茲藥叙公之行誼於墓上石慰登峯之孝  
思併志余嚮往之衷焉爾